

O Le Faamati'e, Faae'etia, o Atina'ega ma le Una'ia o Avanoa mo Tina ma Tama'ita'i Samoa atoa ai ma o latou Aia Tatau Faa-Le-Tulafono.

Namulau'ulu Dr. Nu'ualofa Masoe Toga Potoi

Fesola'i Aleni Sofara, National University of Samoa

Upu Tomua

O lenei Pepa o se tapenaga ua tuu faatasia ma tusia e Tusitala e pei ona faailoa atu i luga e tusa ona valaauina ai e le Mafutaga a le Sosaiete o Piula Tuai ia Ianuari 2015 i le autu e pei ona ta'ua. Ae maise o se fe'au faamalosi mo Faletua o le Auaigaluega i le mataupu e uiga i le Faamati'e, Faae'etia, o Atina'ega mo Avanoa mo Tina ma Tama'ita'i Samoa atoa ai ma o latou Aia Tatau faa-le-Tulafono. O Tusitala o lenei Pepa o tagata tapua'i o le Matagaluega Metotisi i Matafelefele. O le fofogaina ma le faasoaina o le Pepa nei i luma o le Mafutaga a le Sosaiete o Piula Tuai na fofogaina e le Tofa a Namulau'ulu Dr. Gaualofa Masoe Toga Potoi, o le auauna i le faiva faa-Foma'i tau le soifua malololoina, o ia foi o le Failautusi o le Va-i-Fafo (Connexional Secretary) o le Au-uso Fealofani o le Ekalesia Metotisi i Samoa. O le tuufatasa o le Pepa nei i suesuega tau le Tulafono faatasi ma le tapenaina mo le lolomiina na gafa lea ma Fesola'i Aleni Sofara, o le Faiaoga o le Tulafono, Tulafono Tau Pisinisi ma Tulafono faa-le-Aganuu i le Lunivesite Aoa o Samoa.

Faatomuaga

Faamatala Upu – Faaugaina O Le 'Faamati'e' ma le 'Faae'etia.'

Afai e tutusa le “fa'amati'eti'e” ma le “fa'ae'etia” po'o le “fa'a'oloātauina” ona manatu lea ma le agaga mauualalo ua faigata tele ona faamatala e le Pepa nei uiga loloto o ia upu. Ae afai e fa'aaoga le uiga o le “fa'amati'etie” ua faaliluina o le “empowerment” ina ia aliali ma atagia ai le atina'eina o Tamaita'i (Development of Women) poo le una'ia o avanoa mo Tamaita'i (Advancement of Women) ona manatu lea ua faigofie lona faamatalaina.

O le fa'avae o le fesuia'iga o le gagana loloto lea i le tusiaina o lenei Pepa, ona e ma'ale'ale tele le fa'aaogaina o le upu “Empowerment” auā e tele ona faauigaga (connotations) ma e tau faamalosi (pe fosi foi i le maso.) Ae o le faaeteetega ina ne'i pa'ū, pe te'ite'i, pe sā'i ai foi ni finagalo. E talitonu e vave ona talia, ma e talia gofie lava le upu “advancement” poo le “development” auā e o gatasi lea ma le tulaga o Tamaita'i i le aganu'u, aemaise tu ma aga faa Kerisiano pe a faa-Samoa upu ia – o le atinaegao Tamaita'i (Development of Women) poo le una'ia o avanoamo Tamaita'i. (Advancement of Women)

Faamatala Upu – Tina ma Tamaita’i

O le mau a le Palemia o Samoa, le Afioga Tofilau Eti Alesana ina ua faavae le Matagaluega a Tina ma Tamaita’i i le 1991, na ia saunoa ai e faapea: “E TAMA’ITA’I UMA TAMA’ITA’I O SAMOA, AE LE TINA UMA TAMA’ITA’I.” O le eseesega o le faalagiina ma le faatauaina o Tama’ita’i ina ua avea ma Tina, e moomia ai lava le amanaia talafeagai ma le tatau ai, atoa ai ma le malamalama lelei i le fō’iaina poo le fofoina o fitā, o tīgā ma faafitauli e feagai ma Tina ma Tama’ita’i, aemaise lava i taimi o talavou o latou soifua i le tino, le mafaufau ma le agaga.

O le mafuaaga foi lea e finau ai Tina ma Tamaita’i o Samoa ina ia pule pea le Malo i le fesuiā’iga o le faaigoaina o le Matagaluega ina ua toe fetu’unai ma fesuiā’i tiute ma matafaioi (Public Sector Reforms) ae ia ‘aua lava nei tuueseeseina le faasinomaga o “Tina ma Tamaita’i.” Sa finau foi nisi Tamaita’i iloga o le atunuu ina ia fa’aaoga lava na o le upu Tamaita’i ae faatuatuanai le upu Tina, auā foi, fai mai a latou mau, o le mea lava e tasi.

- Ona toe fo’i mai lava lea o se manatu o le Pepa nei i le agaga o le mau a le Tootooalii ia Tofilau: “E Tamaita’i uma Tamaita’i o Samoa, ae lē Tinā uma Tamaita’i.” E manatu ua silafia lava e le toatele:
- nisi Tamaita’i o le atunuu e maliliu taupou lava ona o le tausisia o le mamalu o aiga ma tulaga fa’a-Augafaapae poo le Sa’o Tamaita’i.
- nisi foi Tamaita’i o le atunuu e maliliu taupou lava ona e le fia faia ni o latou aiga.
- Ae o nisi foi Tamaita’i o le atunuu, ona ua pau lava, ua siliga-tali-i-seu taumafaiga uma, ua misi lava le pasi o le vaa – ua le maua lava se to’alua.

Faamatalaina o le Tofa-Manino Faa-Samoa

O le tofa-loloto a Samoa (Samoan psychology) e fa’apea, “O tama a tagata e fafaga i upu ma tala, a’o tama a manu e fafaga i i’a ma fuga o la’au.” (The young of human is fed with words whereas the young of birds are fed with fish and blossoms.) O le loloto o lea vaogagana, e afua mai i le tofa alualu mamao, o le so’otaga o le tagata ma le “Upu,” o le sootaga foi lea o le tagata ma manu ma i’a, faapea ma le sootaga o le tagata ma fuga o la’au.

A tu’u fa’asolo le so’otaga, ona mautinoa ai lea o le “Foafoaga mamana a le Atua.” O le tagata ma le Upu, o manu ma i’a ma fuga o la’au. O lona uiga, na fafagaina e le Atua le tama a le tagata i le Upu, auā, o le Atua o le Upu, sa i le amataga Upu, a’o le Atua foi le Upu. O le Atua na la faaatoa le va-fealoaloai o le poto o le tagata na la aoaoina ma le faaogaina o mea o le foafoaga, e aofia ai meaola o le laueleele ma le sami, atoa ma le fuaga eseesee o le siosiomaga. O lona uiga, e feso’otai mea uma lava o le foafoaga e pei o le tagata ma le vao, sootaga foi o le tagata ma le sami. Mo se

faata'itā'iga: a fuga samasama ma pula manogi le mosooi ma le lagaali, ona mautinoa lea, ua momoga tuitui o le tai-tafola. A sa'o foi le faitauga o po talu ona mavae le atoa o le masina ia Oketopa ma Novema, faatasi ma le fuga o le mosooi ma le lagaali, o lona uiga o le a tetele le palolo.

O le Tofa-manino a Samoa e fia fa'atauaina i le Pepa nei – o le 'Feagaiga.' O le Feagaiga o le va tapuia po'o le feagaiga-sa (sacred covenant between the brother and sister.) O le va tapuia faa-tuafafine ma le tuagane i totonu o aiga. E tutusa lelei lea feagaiga-sa i tulaga fealoaloa'i o le tuafafine ma le tuagane. E i ai le potu e fa'atonu ai nafa fa'atino; e i ai le malosi e tau'ave ai, ma le tamaoaiga e tautua ai le feagaiga-sa. Auā foi, o Tamaita'i e taulasea, o le fai-ōa, o le tausala, e ositaulaga, o le pae ma le auli le tuafafine i le va-tapuia, ae tautua ma le mata'alia le tuagane i le tuafafine ma lona siosiomaga. E manatu o loo ua taoto i lagotonu le faamati'eti'eina o le Tamaitai e pei ona talatalaina ma faamauina mai lona afuaga ma tala faasolopito e pei:

- le Ulua'i Tupu Tafa'ifa o Samoa – o le Tamaitai.
- le valoaga E Tali i Lagi sou Malo – o le Tamaitai.
- ē na feausi mai i le vasa ma le 'Ato Āu - o Tamaitai.
- lē na ta'usalaina ma ola ai Tagaloa-a-lagi ma lana 'au - o le Tamaitai.
- ē na au le inailau - o Tamaitai.....atoa ai ma isi.

E faavae ia tofā manino i le agaga ma lagona atoa ai ma manatu e pei ona taua i luga. O le faamoemoe autu ma le manulauti maualuga o lenei Pepa ina ia toe faamanatu ma toe faasino i ai ni talanoaga ma faasoa mafaufauga i nisi o tulaga o le atina'ega o Tina ma Tamaitai o Samoa. E manatu o loo 'ōpū pea ia tulaga, ma e moomia tele i ai le fesoasoani e le gata i le atunuu lautele, a'o Ekalesia Kerisiano uma i Samoa, e pei o le Ekalesia Metotisi i Samoa e ala atu i lenei Mafutaga Paia a Faifeau ma Faletua uma o le Ekalesia Metotisi ua faaigoaina o le Sosaiete a Piula Tuai.

Atina'eina O Tama'ita'i Faa-le-Aganuu: O Itu Lelei ma Lu'itau

Fai mai le toetele o toeaiina o le atunuu, e lē malamalama i le tapisa lea e finauina ai Aia Tatau a Tamaita'i, ae i Samoa lava ia, e ese le tu maualuga o le tulaga faa le aganu'u o Tamaita'i o le atunuu. E matua sa'o lele lava lea manatu mo Tamaita'i, ae maumau e, pe ana fa'apea e Tamaitai mai lava i le aso na fanau ai seia o'o i le aso e oti ai. Ae pau lona, afai e tumau le tulaga Tamaita'i o tama-fafine o Samoa, o lona uiga ua leai ni fafine. Ae afai ua le ave ma fafine ia Tamaita'i, o lona uiga ua leai ni ē e to'ala fanau e fananau, ma saga fanafanau, e fananau pea ina ia faatupuina gafa ma le faitau aofai o aiga, nuu ma le atunuu, ma Ekalesia foi. O lona uiga, o se atunuu motu tu pe sele motu ona gafa, toe muta gafa o lona fa'asinomaga, ona le mafai lea

ona fa'aaauuina ona talaaga ae e mafai ona faaaauu ona o Tamaitai, ma o le tulaga taua lea ma le maualuga o Tamaita'i i le aganu'u.

Ae pagā lea, e sa'o ai tala a tamaiti, 'e nenefu atoa le channel' ma suia ai loa le tulaga aloaia faa-Tamaita'i pe a fai sona to'alua. Ona tuua loa lea o lona aiga, ae alu loa nofo i le aiga o le tamaloa, aemaise lava ae alu atu o se fafine nofotane laititi, fafine fou i aiga, avea ma to'alua o le taule'ale'a lea o lo'o fa'atino le fatu aiga ma ositaulaga i Tamaita'i o le aiga. O i tonu lava o lo'o nunumi ma manunu ai le to'au i tulaga fa'a le aganu'u o Tina ma Tamaita'i o Samoa. Auā foi, e mamalu lava o le Tamaita'i i lona aiga, fai loa le toalua, avea loa ma maupaolo i lana nofo-ga-tane i le aiga o lona toalua.

E manatu, o i tonu lava lea ua sa'o ai lava le Tofa fetu'una'i a Taitai o Samoa na ioeina ma taliaina le Feagaiga e Fa'amuta ai le Fa'ailoga Tagata ma le Sauaina o Tina ma Tamaitai poo le CEDAW. (*Convention on the Elimination of Discrimination against Women*) Ua ioeina ai e le tatou Malo lona avea ma sui o Malo Aufa'atasi latou te una'ia ma fa'atino le puipuiga o Tina ma Tamaita'i mai le fa'ailoga tagata ma le sauāina.

O le fesili: pe aisea lava, ae poo le a foi le fa'avae autu ua toe fesuia'i ai le aganuu a Samoa e faaeaea ma filemu ai ana tama fafine i lona aiga? Ae nofotane loa i le aiga o lana Tane, suia loa lona mamalu faa-Tama'ita'i i le avea ai ma tavini, tu'ipalai, pologa, mu mata i le umukuka, e muamua ala ae mulimuli foi moe, ma faaititia lona tamaliiaga faa-tamaitai? Faasoa ane lava lou finagalo.pe aisea?

O le isi Atinaega faa le aganuu tau Tamaita'i e fia faasoa i ai le Pepa nei ona e tatau ona amanaia, o le avanoa lea o Tamaitai e avea ai ma matai i o latou foi Aia Tatau faa-suli o suafa. O lo'o manino foi faa-taatiaga o tiute ma matafaioi fa'a le aganu'u lea ua faitioina foi le una'i a Tina ma Tamaitai mo so latou avanoa i fa'atofalaiga fa'a le saofaiga o Alii ma Faipule i totonu o pulega o nuu, ma ua manatu ai nisi, ua faoa e Tamaita'i le tofi faa tama tane o le Pule. E manatu le Pepa nei, e le sa'o lea mau, aua foi, o lea ua manino Tulafono o le Faamasinoga o Fanua ma Suafa, ua aia tutusa Suli Tama Tane ma Suli Tama Fafine i suafa o Aiga.

E le o aofia uma ai Samoa i lea atina'ega mo tamaitai. O lo'o iai lava nisi afioaga o lo'o tapu pea le avea ai o Tamaita'i o ni matai. Ma e lē natia lava i le mamalu o le Mafutaga le lē o mafai e le Malo o Samoa ona tali atoatoa le fesili lea mai le Malo Auafatasi i le tulaga lea. Auā o le mau a Malo Aufaatasi, o le mafua'aga fa'avae lea o le lē toatele o ni Tamaita'i Faipule i le Maota Fono o le Palemene o Samoa, ona o le taotaomia o Tamaita'i mai le umia o suafa matai, atoa ai ma le lē auai i saofaiga a Pulega o nuu.

Tulaga o Tama'ita'i

O upu masani a le atunuu: e loloto le sami ae ua iloga ala o i'a. E tele foi fetū o le lagi ae ua iloga fetu fa'ailo ao ma fetū ta'i-matagi. Fai mai e filifili le vao ae ua iloga foi mauga, o vanu ma ala o manu

O ni fesili tāua e fia fa'atu e avea ma fa'atupu manatu faatatau i lenei faaso'a e fa'apea:

- E tau fa'ailo ea le tulaga o Tina ma Tamaita'i i totonu o Samoa ma le atunuu atoa?
- E tau faaea ea le tulaga o Tina ma Tamaita'i i le nonofo ma le fa'afeagai ai o Alii ma Tamaita'i, a'o le tulaga fa'afeagai o le Tama ma le Teine, fa'apea le fa'afeagai ai o le Tuagane ma le Tuafafine?
- E tau faamati'e ea tulaga o Tina ma Tamaita'i i totonu o le siosiomaga o Samoa ma ona aganuu taoto?

Ae le gata i lea, e tau faamati'e ea ni a, o lea ua ta'oto fa'avae papa o tu ma aganuu mamalu a Samoa, o le Tamaita'i.... o le Feagaiga i totonu o aiga, o Tamaita'i o Augafaapae. A nonofo le saofa'iga o aiga Samoa, e talaga-atoa le Sa'o o le Aiga ae agai mai i le isi tala o le maota e le Itupa o Tamaita'i o le Aiga. E tau faamati'e ea ni a, a'o saofa'iga i totonu o nuu ma afio'aga ua i ai le nu'u o Matai, o le nu'u o Faletua ma Tausi, ae maise o le nuu o Sa'oao po'o Tamaita'i, ua faaigoaina o le Nu'u Paia? Pe tau faamati'e ea ni a, o lea ua nofo suafa nisi o Tamaita'i i suafa matai iloga o aiga a'o nisi o Tamaita'i ua nofo suafa i suafa matai Tulafale....ua tu to'oto'o a latou faautautaga i le fa'afeagai ai ma aiga, nuu, atunuu ma Ekalesia.

E tau asa ea se tulaga ina ia maualuga tulaga o Tamaita'i Samoa, a'o Tala Faasolopito o Samoa na saili malo i le Tamaita'i le sailiga o se ao o le Malo o le Malietoa. E tau fa'aea ea tulaga o Tamaita'i Samoa, ae e le'i vāea lava le fala ooto ua o se Tamaita'i na avea ma Ulua'i Tupu Tafa'ifa o Samoa pau foi lea o le Tupu Tafa'ifa. A'o nei foi aso i Upu fai o Malo, ua atulasi ona pa'i tofi le itupa o Tamaita'i i Tofiga maualuluga o le Malo ma Upufai o Malo, e ui lava e to'agaogao. E aofa'i ia manatu uma i le tala'aga ma le mau malosi ua gagana ai le atunuu e au le Ina'ilau a Tamaita'i.

O lona uiga, o le manatu o le Pepa nei, e lē tau faamati'eina le itupa o Tamaita'i, auā foi, ua iloga lava tofi ma tiute o Tamaita'i....o tiute ma tofiga o Tamaita'i ua ta'oto lava a'o se ala o'o. E pei ona mua'i taua, ma e toe fia faatauaina atili, o le upu Tama'ita'i, o le Tama-sa e Ta'i i Aiga, o le Augafa'apae lea, o le Taupou lea, o le Feagaiga foi lea. Ae tāua foi le Tama'ita'i auā e faa'autama lona manava e ifo mai ai le ola fou i le lalolagi. O lona uiga, o le Tama'ita'i o le Ola. O Tama'ita'i o le ola i le li'o i totonu o aiga. O Tama'ita'i o le ola e fa'amalu nu'u ma Ekalesia, ua fa'apena foi i Upu fai o Malo, ae le gata i lea, o le tautua malo a le itupa o Tama'ita'i.

O le faasoa a le Pepa nei, o Samoa o le atunuu tofi, ua uma foi ona tu'umataga mea uma e feso'otai i tu ma aga a si o tatou atunu'u. O Matai o le Pule...Tama'ita'i o le fatu aiga...Ae a avea nisi Tama'ita'i ma Faletua o ni Tamalii poo Tausi o ni Faleupolu, o latou e faia le faiva o le fautua i o latou alii. Pe avea foi se Tamaitai ma avā a se taule'ale'a, o le tofi lava o le avā a le taule'ale'a o le mu mata i le afi. Ae a avea foi se Tama'ita'i ma Faletua o se Faife'au, o lona uiga, o le valaauina o le Faletua e fai ma soa o le Faifeau i le Galuega tele o le Tala Lelei.

Atina'ega Faa-Le-Olaga Lautele ma Upufai o Malo

Ua manino ma silafia le maualuga o le atinaega o Tamaitai Samoa mai le utiuti o avanoa tau- aoaoga i aso ua mavae ma lo latou saili malo, atoa ma le soifua finafinau mo avanoa mo Aoga Maualuluga ma galuega. Ua lava foi sailiiliga a le Malo e fa'ailo ai le alualu pea i luga o le fuainumera o Tamaitai ua fa'aaogaina i so'o se galuega i totonu o le Malo, Faalapotopotoga Tu-maoti ma Kamupani. Ua siitia foi ma agai i luma le atina'ega o le tele o tulaga o le soifuaga lelei lautele. Ua o'o lava Tamaitai i galuega faa-polofesa (profession) e pei o Fa'amasino, Fomai, Loia, Fomai Nifo, Tausi Soifua, Tausi Tusi, Su'e Tusi, Inisinia, Faaoga, Kapeteni o Vaa, Alii Va'a, Fa'auluuluga o Galuega ma le anoanoai o isi matata.

O avanoa uma ia e tupu a'e ai le loto faafetai ona o le sao taua o Tamaitai. Ae peita'i, tusa lava pe taliaina lautele ma talitonu i le siitia maualuga o le sao o Tamaitai, ae o loo lotolotoi ma miomiō ai lava i totonu o nei atina'ega le fa'ailoga tagata ma le tauemuina o Tamaitai. Tiga lava ona mausali se atina'ega ma i ai pine faamau o ni tulaga tausili o Fa'ailoga Taualoa ua ausia e Tamaitai ma le lelei o auaunaga, e lē o 'asa lava ma le avea ma mataupu o tausuga e taulamua ai lava le itupa malosi o Alii. A loto tele ma lē maluelueina i ni fa'atosina ia se Tamaitai Ofisa Sili (CEO) poo Tamaitai galulue fa'a Polofesa, ua fai foi i ai fa'amatalaga taufaifai: "Se o le tamaloa e ofu i laei o fafine le mea nei." Pe ula foi ma talasua foi fa'apea: "ua matua'i mana'omia sona toalua." (she needs a husband). Pe fai mai fo'i "ua vasti pe ma'i." A lolo foi i le itu ua aliali ai le itu tamaitai, ua lalau le vaivai.

O se ata faata'ita'i o le vaivai faa-Tama'ita'i: o le galuega fa'a Foma'i a le Tamaitai Tusitala o lenei Pepa i ana su'esu'ega faapitoa as a Forensic Pathologist. O suesuga faapitoa e saili ai mafua'aga o tagata malilii i fa'alavelave fa'afuase'i. O le mau a le Tamaitai Foma'i, e lelei lelei lava le faia o ana suesuga i e ua malilii, ae aumai loa se Poloaiga a le Faamasinoga (Coroner) e toe eli mai i luga se maliu ua 3 pe 4 vaiaso talu ona tanu, ona lē mafai loa lea ona ufiufi pe afifi lemu ifo lona itu vaivai fa'a Tama'ita'i; e atu lasi ona nanati i fafo mai le potu su'esu'e, e alu i fafo e au-pua'i ma faasuati ai. Ona ia taumafai lava lea e toe foi i le potu su'esu'e e faamaea lea galuega fita ma le faigata ma le lē manaia, ae ua aliali i luma o isi uso a faigaluega ona

vaivaiga faa-Tamaitai. E vevesi solo lava lona vaivai faa-Tamaita’i, ae toafilemu lava Alii Fomai ma isi o le afaigaluega e pei a e leai se mea o tupu. O nisi na o luitau o le atinaega o le tulaga lautele o le soifuaga i aafiaga o Tamaita’i.

A fa’atusatusa Samoa ma isi atunuu i Asia ma Aferika, po’o Papua Niu Kini foi ma Solomona ia e tau lalata mai, ona lagona ai lea o le lotomauualalo ma le agaga faafetai a’e ona o le tele o fa’amanuiaga a le Atua mo Tina ma Tamaitai Samoa i o latou fa’asinomaga fa’a le aganuu ma lo tatou tofi fa’a le atunu’u.

O nai ‘opū ma nai lave laiti ia o le atina’ega o Tina ma Tamaita’i e osofia ai le loto faafetai i le tofa ma le uta ua avea ai lenei mataupu o se vaega o le Faasoa a le Sosaiete a Piula Tuai i la outou Mafutaga i lenei tausaga. Auā e ui i nei mau atina’e, ae o lo’o i ai pea le sauaina o Tina ma Tamaitai. O loo i ai pea le lima-tētē o Alii faasaga i Tamaita’i, ma o le misitelio lilo, e le iloa lava itu-taimi o le fili e lamatia ai siosiomaga faa-Tamaita’i.

O mataupu tonu lava ia e mana’omia ai le talanoa ma saga talanoa pea i ai. E lē toe aogā ona fa’alilolilo ma tatou fa’afoliga tatou te le o iloaina a’o lea lava tatou te miomio faatasi ma le sauaina o Tamaita’i. E tatau foi i le Sosaiete a Piula Tuai ona iloilo toto’a lona siosiomaga po’o taulamua Faifeau i le fa’afaiileina o le atina’e lelei o Tina ma Tamaitai, poo fa’alilolilo pea ma lē aliali le sauaina e nisi Faifeau o nai o latou Faletua. E! talofa e, talosia e leai.

Tama’ita’i ma Upufai o Malo

O le atina’ega mo le avea o sui Faipule i le Palemene ma Upufai o Malo, o lea lava ua i ai pine faamau o le ausiaina e Tina ma Tamaitai. Amata mai i le 1974 ia Leaupepe Taulapapa Faimaala; Laulu Fetauimalemau Mataafa; Aiono Dr. Fanaafi Ma’ia; Matatumua Maimoaga; Tavu’i Lene; Fuimaono Te’i; Safuneituuga Neri Pa’aga ma isi tamaitai faipule o loo iai nei e pei o Fiamē Naomi Mataafa; Gatoloaifaana Amataga Alesana-Gidlow ma Faimalotoa Kika Stowers. O lo’o avea foi nisi o nei tamaitai ma Minista o le Kapeneta. O lona uiga i le 40 tausaga talu ai – e na o le toasefulu Sui Faipule Tamaita’i ua ofi atu i le Palemene o Samoa. O loo taumafai pea le tatou Malo e fa’atupulaia avanoa mo Tina ma Tamaitai i totonu o le Maota o le Palemene e pei ona i ai nei le toe teuteuina o le Faavae o Samoa faapea ai ma le Tulafono o Faiga Palota ina ia ausia le 10% poo le le itiiti ifo ma la to’a lima (5) sui Tamaita’i o le Palemene o Samoa mo Tamaitai i soo se paeaiga. O tulaga tausili uma ia (achievements) mo Tamaita’i e ui ina tuai lona faagasologa ma le faatinoina, ae fai mai le upu “e sili le tuai nai lo le leai.” (Better late than never or nothing)

Mo lo outou silafia le mamalu e, o le Mafutaga a Faifeau o Piula Tuai, o le faiga lea ua faatulafonoina nei mo Avanoa o Tamaita’i i le Palemene, o le tali lea a Samoa i le una’i a Malo Afaatasi lea e lē o mafai ai e o tatou Taitai o le Malo ona tali ma

fa'amatala le Fa'avae faa Samoa fa'apea agaifanua o afioaga e lē agava'a ai nisi o Tamaita'i i suafa matai ina ia mafai ona tauva ai faiga palota. O le sailiga avanoa lena na maua mai i le tausisia o le feagaiga e pei ona taua i luga o le CEDAW.

Atina'ega o Tofiga a le Ekalesia ma le Tulafono

Ona o'o mai loa lea o se fa'amatalaga i tofiga ma atina'ega fa'a Ekalesia. E faasoa lava lenei Pepa ma le ava atoa ma le faaeteete ona o le mataupu nei e le soona faia i ai se manatu ona ua taoto lava Faavae, o Tulafono ma faiga-faavae (policies) a le Ekalesia e faatatau i Tofiga o Faifeau, ma e patino lava na o le itupa o Alii. E le faatagaina foi ni Tamaita'i e ulufale atu e a'otauina i le Kolisi Faafaifeau i Piula. O le feau lena o loo momoli mai i ia faiga-faavae, e le agavaa ai ni Tamaita'i e avea ma Faifeau o le Ekalesia. E faapea foi i isi Ekalesia i Samoa nei vagana ai le Lotu Anekelikana (Anglican Church) i Samoa ua faatagaina ai Tamaita'i e avea ma Faifeau. Vagana ai lava o isi Tofiga o le Ekalesia e pei o le Tiakono i le EFKS ma le Taitai o le Lafu Mamoe i le Ekalesia Metotisi o loo talia ai le faaogaina o Tamaita'i.

O le fesili le pa'ia e, o le Mafutaga, faamata e le o atagia ai i ia faiga-faavae a le Ekalesia le faailoga tagata? Ae maise lava, o le faailoga tagata faasaga i Tamaita'i? E mafua le fesili ona o le taamiloga o le lalolagi ma le suiga poo le matagi o suiga ua i ai le lalolagi i nei ona aso. Aua foi, ua i ai Tamaita'i o Samoa faapea fanau Tamaita'i o le Ekalesia Metotisi ua maua Faailoga Tualoa maualuluga o le Mataupu Silisili mo le galuega faa-Faifeau ae peita'i, e le o talia ona faaogaina ma galulue i le Ekalesia i Samoa nei ona o le Tulafono ma faiga-faavae a le Ekalesia. O le a lē sagolegole le Pepa nei ona e pule lava le Ekalesia. E le finau vale foi le Pepa nei, ae na ona faamanatu ma faataoto atu e le Pepa nei le Faavae o Samoa. E ao ina manatua, e aofia ai ma le Ekalesia Metotisi ma Ekalesia uma i totonu o si tatou atunuu i lalo o le Faavae, atoa ai ma le talitonuga faa-le-faavae: 'E faavae i le Atua Samoa.'

- le vaega 2 (1) o le Faavae o Samoa o loo faailoa ai le avea o le Faavae o Samoa ma Tulafono Sili poo le Supreme Law.⁷
- Vaega 2 (2) o loo faailoa mai ai soo se isi lava Tulafono e feteena'i pe faatautee ma le Faavae, e faaleaogaina lea Tulafono i le vaega tonu o feteena'i ai, ae aloa'ia pea le malosiga o le Faavae.⁸
- Vaega 11 o le Faavae o Samoa o loo faailoa ai le tuusa'oloto ai o mataupu tau Tapua'iga poo le Freedom of Religion.⁹

⁷ Article 2 of the Constitution of Samoa. **The Supreme Law - (1)** This Constitution shall be the supreme law of Samoa

⁸ Article 2 of the Constitution of Samoa. **(2)** Any existing law and any law passed after the date of coming into force of this Constitution which is inconsistent with this Constitution shall, to the extent of the inconsistency, be void.

- le vaega 15 (1) o le Faavae o Samoa o loo faailoa mai ai le saolotoga mai le faailoga tagata.¹⁰ O lona uiga, e tutusa tagata uma i lalo o le Tulafono ma e tutusa ona puipuia tagata uma i lalo o le Tulafono.

A fua la i aia tatau ma aia tutusa atoa ai ma saolotoga mo tagata uma o loo faataoto mai e le Faavae o Samoa, faamata o faapea ona faaoga e le Ekalesia Metotisi ma isi Ekalesia i Samoa nei le atina'ega, o agava'a ma tomai o ia Tamaitai o Samoa ua maua Faailoga Taualoa o le Mataupu Silisili, ua agava'a i le galuega faa-Faifeau i atunuu i fafo i Ekalesia e pei o le Perepereane (Presbyterian) le Ekalesia Metotisi i Niu Sila, o le Uniting Church o Ausetalia ma isi atunuu, ae lē talia ona faaogaina i Samoa nei? Faamata aisea? Ae pe o i ai foi se fa'amati'e a le Ekalesia i Samoa mo fanau Tamaita'i a le atunuu ua ausia Faailoga Taualoa e avea ai ma Faifeau? Ae faapefea le mataupu o le "Calling" poo le "Valaauina?" Ua ala ona ta'ua ia mea, auā o le vailiu tonu lava lea o le valaauina mo le tapenaina o lenei Pepa mo le Mafutaga a le Sosaiete a Piula Tuai i lenei foi tausaga.

O le manatu o le Pepa nei, o le vaega tonu lava lea e ono talafeagai ona fa'aaoga i ai le upu faamati'e poo le fa'amati'eti'e. E tumau le talitonuga, e le suia ai faavae ma faiga-faavae a le Ekalesia i le Pepa nei, ae o se tulaga o loo saili ai pea se avanoa tutusa o Tamaita'i ua a'oa'oina ma agava'a mo lea tofi. Ae taoto atu pea i Faifeau ma le Ekalesia, auā o le agaga tonu lena o le Pepa nei, ua na o se faamanatu ma se tuualalo i ni tulaga e moomia ai le fa'amati'e a le Ekalesia mo Tamaita'i aua foi, ua ia te outou le 'oa o le Mataupu Silisili, le Tofa ma le Faatuatuaga, o Talaaga o le Ekalesia ma le faiva o le saili agaga ma le faaola agaga.

Ae a silasila le Mafutaga ma outou su'esu'e loloto i le Faavae o Samoa fa'atasi ai ma Faiga-Faavae a le Malo o lo'o taialaina ai le atina'ega o ona tagata, ona outou talitonu ma mautinoa ai lea, e lē o lōtea e le Malo pe tagofia pe talanoaina le atina'ega o le soifua faa-le-agaga o ona tagatanuu. E le o 'apa'apa foi le Malo i aia tutusa e faamati'e ai Tamaita'i Samoa i le li'o o Ekalesia. Ua taatia lava i Ta'ita'i ma Pulega o Ekalesia lava ia.

E manatu le Pepa nei, e le faigofie, e faigata foi ona fai i ai se finagalo o le Malo ona o Taitai o le Malo, o i latou foi o isi tagata lotu i Ekalesia o loo latou o tapuai ai. Ae o le fesili la: a'o fea la le saga taulagi pea e Faavae i le Atua Samoa, a'o lea e gugu le Malo i le vala lea? E ao lava ina manatua, o le Faavae o le Malo Tutoatasi o Samoa e faamalumu mo Samoa ma ona tagata uma, e aofia ai ma Ekalesia.

⁹Article 11 of the Constitution of Samoa. **(1)** Every person has the right to freedom of thought, conscience and religion; this right includes freedom to change his religion or belief, and freedom, either alone or in a community with others, and, in public or private, to manifest and propagate his religion or belief in worship, teaching, practice and observance.

¹⁰**Freedom from discriminatory legislation - (1)** All persons are equal before the law and entitled to equal protection under the law.

Faamatalaga o le Faamati'eina (Empowerment) o Tama'ita'i

O le aotelega ua i ai nei le lalolagi atia'e ma talitonuga lautele....lea e faapea mai: O Tamaita'i o le fofo e fo'ia ai le mativa o le lalolagi. 'Women are the solution to poverty.'¹¹ O le mau o le faae'etia, atinaega ma le unaia o avanoa mo Tina ma Tamaitai lenei ua so'o ma opo atoa ai le lalolagi, auā o le talitonuga lautele, pau lea o le auala e mafai ona fo'ia ai le mativa o le lalolagi. Ua lē gata ina saga una'ia e Malo Afaatasi, ae ua faapea foi ona aumai ai le mau malosi a le Faletupe o le Lalolagi (World Bank) ma faapea mai: The World Bank states:

*"Empowerment of Women and gender equality are issues of development effectiveness, not just a matter of political correctness or kindness to women. New evidence demonstrates that when women and men are relatively equal, economies tend to grow faster, the poor will move more quickly out of poverty, and the well-being of men, women and children is enhanced."*¹²

Faaliliuina: O le faamati'e, atina'ega faapea ma tulaga o Tamaitai o aafiaga e ao ina silasila i ai tulaga tau Pulega o Malo ma faaleleia ia vaega mo Tamaitai. Aua ua mautinoa i suesuega a le Faletupe o le Lalolagi, afai e tulaga tutusa Alii ma Tamaitai, o lona uiga o le a vave faatupula'ia le tamaoaiga o le lalolagi, o le a vave ona faaitiitia le mativa, atoa ai ma soifua lelei o alii, tamaitai atoa ai ma fanau.

O lona uiga, o lea lava ua manino le mata o le vai ua avea nei le mataupu ua 'autasia ai le lalolagi, pau lea o le auala e fo'ia ai le mativa, lea e auala mai ai le mau lautele: "Women is now a global mechanism to resolve poverty."¹³ E le o se faaeaea poo se alofa faitino mo Tamaita'i, ae o le talitonuga lautele, o Tamaita'i e mafai ona fo'ia le mativa o le lalolagi.

E lagolagoina tele foi le mau nei e le United Nations Development Programme (UNDP) lea e faapea mai:

*"UNDP focuses on gender equality and women's empowerment not only as human rights, but also because they are a pathway to achieving the Millennium Development Goals and sustainable development."*¹⁴

Faaliliuina: E taula'i le vaai a le Polokalame o Atina'e o Malo Afaatasi (UNDP) i avanoa tutusa atoa ai ma le faamati'eina o Tamaitai, e le gata i o latou aia tatau, ae ona ua mautinoa foi, o le laasaga lea e mafai ai ona ausia le Manulauti o le Meleniuma ma faatumauiina atina'e.

O Millennium Development Goals e pei ona ta'ua e āfa e tasi lava i le manatu ina ia "Faamati'eina ia Tamaitai" o le auala lea e mafai ona faaitiitia ai le mativa, atoa ai ma

¹¹ www.pciglobal.org/empowering-women

¹² www.worldbank.org/

¹³ www.empowering.org/

¹⁴ www.undp.org/gender/

le fo'ia ai o le mativa. O le fesili: Pe faapefea ona faaitiitia le mativa pe fo'ia foi le mativa pe afai e mafai ona faatino le "Faamati'e o Tamaitai"? How can poverty be so resolved when women are empowered?

O le tali o le fesili lenei e maua i le mau a Phumzile Miambo-Ngcuka na ia faapea ai:

"As the Executive Director of UN Women, I will push for women's economic empowerment alongside other priorities, because this is essential to ending poverty and advancing gender equality. Women have a right to equal opportunities and equal access to resources and training. This is why I am so proud of our new online partnership platform to advance the economic empowerment of women. When women are empowered, the benefits ripple outwards and bring benefits to many others. I encourage everyone to join us at www.empowerwomen.org and be part of this exciting initiative."¹⁵

Faaliliuina: I le avea ai o a'u ma Pule Faatonu a Malo Aafaatasi mo Tamaitai, o le a ou una'ia le faamati'eina o Tamaitai i mataupu tau le tamaoaiga faatasi ma isi laasaga tatau ai, e avea ma vaega taua e muta ai le mativa ma faataua atili ai avanoa tutusa. Ua faagaetia lava a'u nei i fesoota'iga faa-paaga i uega tafa'ilagi e una'ia atili ai le faamati'eti'eina o Tamaitai. A faamapu'e pe faamati'e Tamaitai, e fua mai faamanuiaga e manuia ai ma isi. Ou te faamalosi ai ma una'i ina ia tatou auai faatasi ma i matou i le www.empowerwomen.org i lea laasaga lelei ua faatinoina.

E faavae le mau a le Pule Faatonu o Malo Aafaatasi i mataupu tau Tamaitai i le alafua ua faataoto e le Ofisa Tutotonu o Malo Aafaatasi e faapea:

"The Women's Empowerment Principles are a set of Principles for business offering guidance on how to empower women in the workplace, marketplace and community. They are the result of a collaboration between the United Nations Entity for Gender Equality and the Empowerment of Women (UN Women) and the United Nations Global Compact and are adapted from the Calvert Women's Principles. The development of the Women's Empowerment Principles included an international multi-stakeholder consultation process, which began in March 2009 and culminated in their launch on International Women's Day in March 2010."¹⁶

Faaliliuina: O Mataupu Autu poo le tuuafaatasia o mataupu autu e faatatau lea i le faamati'eina o Tamaitai e aofia ai le faailoa o mataupu tau pisinisi ina ia lautele le silafia i le faatinoina o galuega i fale-faigaluega, o nofoaga faitete faapei o maketi atoa ai ma auaunaga mo tagata lautele. O le taunuuga ia o sootaga ma le galulue faatasi o le United Nations Entity for Gender Equality and the Empowerment of Women (UN Women) and the United Nations Global Compact atoa ai ma isi paaga i faatalatalanoaga ma le faasoa o manatu na afua mai i le masina o Mati 2009 ma le faailoa aloa'ia nei autu i le aso ua ta'ua o le aso o Tamaitai o le Lalolagi i le masina o Mati 2010.

¹⁵ www.empowering.org

¹⁶ www.empowering.org

The Seven (7) Principles in Empowerment of Women.¹⁷

- Principle 1: Establish high-level corporate leadership for gender equality
- Principle 2: Treat all women and men fairly at work – respect and support human rights and nondiscrimination
- Principle 3: Ensure the health, safety and well-being of all women and men workers
- Principle 4: Promote education, training and professional development for women
- Principle 5: Implement enterprise development, supply chain and marketing practices that empower women
- Principle 6: Promote equality through community initiatives and advocacy
- Principle 7: Measure and publicly report on progress to achieve gender equality.

Mataupu Autu e Fitu (7) o le Faamati'eina o Tamaitai

- Autu 1: Ia faatatauina se tulaga maualuga o mataupu o le avea ma Ta'ita'i (leadership) e laugatasi ai Alii ma Tamaitai.
- Autu 2: Ia faia ma le lē faailoga tagata, ia faaaloalo ma lagolago aia tatau e laugatasia ai galuega a Alii ma Tamaitai.
- Autu 3: Ia mautinoa le ola maloloina, saogalemu ma le tulaga lelei o tagata faigaluega uma e aofia ai Alii ma Tamaitai.
- Autu 4: Una'ia le soifua aoaoina, faatino a'oa'oga faataitai i se tuaga maualuga tau atina'e mo Tamaitai.
- Autu 5: Faatino atina'e lautele ma aoaoga o fefaatauaiga ma maketiina o oloa e saga faamati'e ai Tamaitai.
- Autu 6: Faalauiloa i tulaga lautele le taua o le soifua tutusa mo tagata uma.
- Autu 7: Tuuina mai faamatalaga ma faailoa faalauaitete laasaga uma o taumafaiga e ausia le ola tutusa.

Mau a Le World Federation Of Methodist and The Uniting Church Women Faatatau i le Mataupu o le Faaee'etia, Atina'ega ma le Una'ia o Avanoa mo Tina ma Tama'ita'i Samoa.

O le tausaga 2014 na atoa ai le 75 tausaga o le faalapotopotoga o Tamaita'i Metotisi ma Ekalesia Soofaatasi o le Lalolagi. Ma o le Au-Usa Fealofani a le Ekalesia Metotisi i Samoa o se sui auai tuaoloa mai le Lunite (Unit) o le Pasefika i Saute. Ina ua faavaeina

¹⁷www.empowering.org

lenei faalapotopotoga i le 1939, sa saunoa le Peresetene faapea: “The affairs of the World are too important to be left to only men.”¹⁸ O aafiaga o le lalolagi e taua tele, e le tatau ai ona tuu tasi na o le itupa o alii.

Mo le silafia:

- Iana Tagavai - ‘Ia iloa Keriso ma faailoa atu o ia i nisi’ (To Know Christ and to make Him known).
- Iana Pine Tauave o le “Laaui o le Ola (Tree of Life).

O faiga faavae ma polokalame uma a Tina ma Tamaitai Metotisi ma Ekalesia soso’o o le Lalolagi e lima ta’ita’iina i faiga fa’avae ma Polokalame e tu’uina mai e le WFMUCW. Na amata mai i le tausaga 2006 i lana fonotaga lona 11 i Korea i Saute- sa auai atu i ai sui o le Au Uso Fealofani mai Samoa nei. Sa fa’apea ona amatalia ai Polokalame a le WFMUCW e lagolagoina ai Mellinium Development Goals (MDGs) a Malo Aafaatasi mo le lalolagi atoa e aofia ai le Au Uso Fealofani a le Ekalesia Metotisi i Samoa.

I lana fonotaga lona 12 i Aferika i Saute i le 2011, sa fa’aaau ai i lenei Fonotaga le lagolagoina o Mellinium Development Goals.¹⁹ I le fonotaga a le Lunite a le Pasefika i Saute, sa usuia i Brisbane Ausetalia ia Iulai 2014 sa tuuina atu ai se Ripoti aloaia a le Au Uso Fealofani o le Ekalesia Metotisi i Samoa ma maitauina ai le alualu i luma ma le solosolo lelei o le tulaga faaetia ma le maualuga o loo i ai Tamaitai Samoa. O le fonotaga lona 13 a le WFMUCW e usuia i Houston/Texas i Amerika ia Setema 2016 e toe iloilo ai le tulaga ua oo i ai MDGs mai sui uma o lenei Faalapotopotoga a Tina ma Tamaitai Metotisi o le lalolagi.

Tama’itai Samoa ma le Tamaoaiga

A silasila la le Mafutaga a le Sosaiete a Piula Tuai, o alafua ia ua faataoto mai e uiga i le “faamati’e poo le faamati’eina o Tamaitai’i” e faasaga tonu lava i suiga ua tatau ma lenei vaitaimi, ae o ni suiga foi ua tatau ma talafeagai. O ia foi suiga o le a lē vaea ai le fala ooto i mamalu faa-Tamaitai’i Samoa ae maise le Itupa o Tina. O le “Faaetia – Atinaega ma le unaia o avanoa mo pulega o Tina ma Tamaitai” o ni suiga ua talafeagai ma lenei vaitau, aemaise o lona taunu’uga taua o le a mafai ona foia ai le mativa. Ae le gata i lea, e i ai le manatu o le Pepa nei, o le a leai se iota o mamalu

¹⁸Speech by President of the World Federation of Methodist and Uniting Women (WFMUW) 1939

¹⁹World Federation of Methodist and Uniting Church Women (WFMUCW) Action Plan For Millenium Development Goals. (South Africa 2011) <http://www.wfmucw.org> > about > action-plan.

faa-Tamaita'i Samoa o le a aveesea ai i le mataupu nei. Auā o le upu moni lava ma upu tautino e faatatau i nei ona aso, e āumā ea le faamaepaepa i le fale ona o le Auga Faapae ma saga tausī pea mamalu fa'a-Tamaitai, ae fia aai le aiga? Se a le uiga o le Tamaita'i Samoa na ona ala i le taeao ma teuteu foliga ma le tino ae leai se mea e tua i ai?

Ua faafofoga so'o foi le atunuu i le leitio i le Vii o Piula, le pese matanana toe limalala'u a le Kolisi, fai mai a alu atu se Tamaita'i i le laumua i le Kolisi i Piula, e leai se mea e fai, na o le ala mai fai le mea e tatau ai, ti'eti'e i le sofa, ma faamave'uve'u lou foga. Atonu e sa'o le matanana i aso lava la ua leva, ae o aso nei, o le fesili: Tamaitai e, na o le ti'eti'e i le sofa, ma faamave'uve'u solo ane lou foga.....ae maua ai se tausiga a le aiga? O le uiga moni o le Empowerment of Women, o le una'ia lea o le ola aoaoina poo a'oaoga mo Tamaitai. E le faapito manu ia tasi na o a'oaoga mo Faailoga Taualoa poo ni faailoga maoa'e o le poto salalau, ae o a'oaoga e mafai ona maua ai faamanuiaga poo tau i galuega faatino, e aofia ai pisinisi laiti eseese ma tomā faapitoa e faatino ai nisi faiga e mafai ai ona maua ai tau i faamanuiaga tau le tamaoaiga.

Fofoaga - Alii ma Tama'ita'i

E ao ina silafia, o le finauina i aoaga ma tomā faapitoa ina ia maualafia avanoa tutusa (equal opportunities) o le agaga lava ia tutupu faatasi ma ola faatasi Tama'ita'i ma le Itupa o Alii. Ae ao lava ina manatua, e lē o le faatusatusa ina ia tutusa Tamaita'i ma le Itupa o Alii i le tulaga o le malosī. Aua foi, ua tuumatamaga le fofoaga a le Atua, *masculine*²⁰ and *feminism*.²¹ Pau foi lea o le taimi e talitonu ai le Pepa nei faatoa moni ai le ta'ua o Tina ma Tamaita'i - o le itupa vaivai, pe a oo i tulaga o le malosī. Aua foi, e mafai e alii poo tamaloloa ona amo o le ta'i tolu taga simā; ae toetoe a lē gafatia e Tamaita'i ona sii se afa taga simā. E mafai e alii poo tamaloloa ona sii o latou taitoalua pe afai ua lē mafai ona savavali ona ua mama'i, ae matua lē mafaia e Tina ona sii o latou taitoalua ona o le eseese o malosī, e mafua ona o fausaga faa-le-fofoaga na faia ai i tatou e le Atua.

E i ai foi ni eseese taua ua maua mai suesuega a foma'i i eseese o fai'ai (brains) o Alii ma Tamaita'i. Fai mai e tēlē atu le mamafa o le faiai o le tane pe tusa ma le 10% e mamafa ai nai lo fai'ai o tamaita'i. E ui i lena eseese, e lē faapea a tēlē pe mamafa le fai'ai o tane - ona popoto ai lea. E pei ona faailoa i suesuega, e mafai ona

²⁰Having qualities or an appearance traditionally associated with men or boys.

<https://dictionary.cambridge.org/dictionary/masculine>.

²¹Feminism works towards equality, not female superiority.

<https://www.dosomething.org/facts/11-facts-about-fem>.

lapopoa ma mamafa fai'ai o Alii. *'Brains can be heavier and can be brainier but can also be stupid.'*²² E mafua ona mamafa fai'ai o alii ona e fua faatatau i le mamafa tele o maso ma ponaivi o le tino o le tane. O tane e tele ina faaaoga le itu agavale o ō latou fai'ai ae o fafine e faaaoga uma itu e lua o le fai'ai. I suesuega a le au atamamai ua mautinoa ai o fai'ai o tane e atamamai i mataupu tau fuainumera ma le matematika e sili atu nai lo fafine, ae, e i ai faatasi ma le loto ita, ma tele ai pea le loto ita, atonu o mafuaaga ia o le soona sauā i nai Tamaitai,²³ e i ai faatasi ma le uiga o Alii o le fia tautala tasi. I suesuega lava ia a le au atamamai, ua mautinoa ai, o tamaitai e popoto lava i latou i vaogagana, ma e lelei tele latou i mataupu tau fesootaiga – excellent communicators.

E i ai itu o fai'ai o tamaitai e tetele atu nai lo tane ona o vaega ia o le fai'ai na te faatonutonuina lagona (control the emotions) ma lagona eseese, ma e talafeauga lea ma le natura o le Tamaitai'i na te faafailele ma tausi ia malu puipua lana fanau.²⁴ Peitai o le itupa o Alii e telē le itu o lona fai'ai e maualafia ai ona tali atu o ia i ni fili e ono lamatia le saogalemu o lona aiga. E manatu lea suesuega, o le malosī foi lea e faaosofia ai le itupa o alii e maualafia ai ona atamai e saili avā poo le su'e manamea tamaitai poo ni ana manamea tamaitai ma isi lava eseese ua molimauina mai suesuega tuufaatasi a Harvard University ma Berkley University i Amerika.²⁵

O le fe'au taua mo le Pepa: "E manaomia le soifua tutusa o le Ali'i ma le Tama'ita'i, poo le tane ma le fafine mo se soifuaga fiafia ma le manuia o tagata soifua."

Ae o le autu o mafauauga lea e auga tonu i ai le fe'au o le Faamati'eina o Tamaitai'i; o le poto ma tomā faa-le-Atua. (Godly Wisdom) E mafai i le poto faa-le-Atua ona ta'itai'ina Tamaitai'i o Samoa i isi mea sili ona lelei e mafai ona faatinoina mo le manuia o le tamāoaiga e le gata i totonu o aiga, o le nuu, le atunuu ma le Ekalesia. E mafai foi ona avea Tina ma Tama'ita'i o se mea faigaluega e fofoina ma fo'ia le mativa o le lalolagi.

Lagolago a le Malo o Samoa

O le mataupu o le Faamati'eina o Tamaitai na autu foi i ai le Pepa a le Malo o Samoa na fofogaina e le Minisita o Tina ma Tamaitai, Lotoifale ma Aga Fesoota'i, le Afioga Hon. Tolofuaivalelei Falemoe Leiatua i le fono lona 57 a le Komisi i Tulaga o Tamaitai lea sa usuia i Niu loka i le aso 05 Mati 2013, lea na ia saunoa ai e faailoa ma faamautu le lagolago a le Malo o Samoa i le una'ia o le Faamati'eina o Tama'ita'i,

²²Joint Research by Harvard University and Berkley University www.brainfitnessforlife.com

²³ *Ibid*

²⁴ *Ibid*

²⁵ *Ibid*

atoa ai ma le una'ia o aia tutusa o Tamaita'i o Samoa ina ia o gatasi ma tulaga ua i ai le una'ia o le Faamati'eina o Tamaita'i e le gata i le Pasefika a'o le lalolagi.²⁶

Ua matauina i Samoa i nei ona aso ni suiga tetele i lenei vaitau ona o le faamatie, una'ia ma le faamalosi i Tamaitai, lea ua tulai mai se numera mauuluga o Tamaita'i ua faauluulu i ai Matagaluega faapea ma Faalapotopotoga Tumaoti a le Malo, ua siitia ma sili mamao atu nai lo le itupa o Alii.²⁷ I le ripoti o le Mellinium Development Goals Review o le Malo o Samoa i le 2012 - 2016 ua faailoa mai ai le faateleina o Inisinia Tamaitai i le Faalapotopotoga o Inisinia Faamauina o Samoa.²⁸ O loo faaalua ai foi i le ripoti lava lea le siitia maoa'e o fanau Tamaita'i o le atunuu ua i'u mai ma ausia Faailoga Taualoa faa-Foma'i ma ua fulisia i Tamaitai i le 55% faatusatusa lea i le 45% o Alii Fomai.²⁹ I le Sosaiete o Loia i Samoa nei, ua laasia nei le 68% le aofai o Loia Tamaitai faatusatusa i Alii Loia e na o le 32%.³⁰ O le Faalapotopotoga o Faiaoga i Samoa nei ua faamauina le 62% o Tamaitai faatusatusa i Alii na o le 38%.³¹ O le aufaifaailoga o le Tofa Manino o le Atamai (PhD) poo le Doctrate i tomai eseese i Samoa nei ua fulisia lava i Tamaitai.³² Lea foi la ua avea ma vaega o le Tulafono le tataua ona atoa le 10% o sui Tamaitai i totonu o Upufai o Malo i le Palemene o Samoa i soo se nofoaiga. E manatu ai le Pepa nei, o le ata manino lea o le la'ala'a i luma o le faamati'eina ma le faae'etia o Tamaita'i i totonu o Samoa.

I le aotelega o faamatalaga tuuina mai i le Faalapotopotoga o Pisinisi mo Tamaita'i (Women in Business)³³ o loo matauina ai le una'ia pea o Tamaita'i ina ia aoaoina i tulaga o tomai faa-faipisinisi laiti i totonu o le atunuu. O le agaga lava o le Malo ina ia mafai ona maufaitua aiga ona o taumafaiga a Tamaita'i. E o gatasi lava lea ma le uiga o le mau autu a Malo Afaatasi, o Tamaitai e mafai ona fo'ia ai le mativa o le lalolagi.³⁴

Fautuaga mo Faletua o le Mafutaga

Mo le Mafutaga o le Sosaiete a Piula Tuai, e faapito augafa se manatu o le Pepa nei mo Tamaitai Samoa ua avea ma Faletua o Faafeagaiga poo Faletua o le Faifeau. E le

²⁶FIFTY-SEVENTH SESSION OF THE COMMISSION ON THE STATUS OF WOMEN (NEW YORK 05 MARCH 2013 “At the outset, I wish to reaffirm that the Government of Samoa remains committed to the empowerment of women and girls and improving gender equality, in line with our global and regional gender equality commitments.”www.un.org/womenwatch/daw/csw/csw57/generaldiscussion/memberstate

²⁷ Report: STRATEGY FOR THE DEVELOPMENT OF SAMOA 2013
<https://www.mof.gov.ws/uploads/2019/08>

²⁸Ibid

²⁹Ibid

³⁰Ibid

³¹Ibid

³²Ibid

³³ Samoa Women in Business Development Inc. <https://www.womeninbusiness.ws>

³⁴ www.empowering.org

itiiti lou tou sao taua i o outou faiva faa-teine, o outou faiva faa-Tamaita'i Samoa, o outou faiva faa-Faletua poo Tina foi....o tofi lava mai le Alii. E le tau faamati'eti'eina outou, o o outou lava tofi o le soaina o outou taitoalua ina ia manuia lou tou soifua galulue i le galuega a le Atua, ae le gata i lea o soo se faiva, ae aofia ai ma le tulaga lelei o le tamaoaiga.

O le fautuaga a le Pepa nei mo Faletua uma o le Mafutaga a le Sosaiete o Piula Tuai, muamua, ina ne'i taotaomia lou naunau i mea sili e faamati'e atili ma una'ia le lumanai lelei o aiga ma le Ekalesia ona e fia-tautala-tasi lou toalua Faifeau atoa ai ma le sauaina o oe e ala i upu taufaifai, upu malolosi pe masoā foi, pe fai faatonuga faigata si alii, pe faamaasiasi oe i luma o le lua aulotu, o le fautuaga a le Pepa nei, Faletua, 'aia le nofoa'i, ia e tautala, tautala e faailoa ma faaali. Speak up, speak out and make it known.

Lona lua o fautuaga, ia le seetia gofie outou Faletua, ae ao ina mataala ma māta'itu. Auā foi, afai e faaeaea mai ia te outou Tama'ita'i e, ona lē ese lea o outou ma le tala ia Tapusalaia lea na ia tofofi Asomua e fai lo la nuu. O tofiga, e talagā atoa oe Asomua, e talaga atoa a'u, ae Ali'ita'i ia te oe lo ta nuu. Na tali Asomua, o ai na manatu o le a sii le fale o Asomua i le mauga? Ia lē o le faaeaea mai i Tamaitai ma outou seetia ai, ae ia fai ma faamalosiua ia te outou Tamaita'i i o tatou faiva ma tiute aua se lelei o aiga nuu atunuu ma Ekalesia. Ia lē molia foi outou Tamaita'i e, i le malū o peau o le tai taeao, ae ia tumau lo outou soifua finau ma saili e ala i le FA'AE'ETIA - ATINAEGA MA LE UNAIA O AVANOA MO TINA MA TAMAITAI SAMOA aua se manuia lautele o le lalolagi, e pei ona i ai lea talitonuga, ma o le a mafai ai ona fo'ia ai le mativa o le lalolagi faapea foi le Pasefika ma Samoa nei. The famous saying: "Behind a successful gentleman is a dynamic woman."³⁵ Faletua e, ma Tama'ita'i e, ia outou olioli i le Alii e le aunoa, auā foi, ua lelei ma manuia tou taitoalua - ona o a outou galuega, ua manuia o outou aiga - ona o outou, because you...the women...are dynamic.

O Lu'itau – mo le Tofa Saili a le Sosaiete o Piula Tuai e Ono Saga Faae'etia, Atina'ega ma le Una'ia O Avanoa mo Tina ma Tamaita'i Samoa i le Lumanai

- le aoaoina o Tamaitai i le Kolisi Faa-Faifeau i Piula mo le tofi faifeau mo Tamaita'i a ++ua o loo taotaomia pea ma lē talia e le Ekalesia Metotisi i Samoa.

³⁵Women Leaders: Dynamic, Courageous and Successful.
<https://cciconsulting.com/women-leaders-dynamic-co...>

- le tofi Failauga o Tamaita’i ua faamutaina i se faaiuga a le Koneferenisi a le Ekalesia Metotisi i Samoa i le 2012.
- Poo le a se finagalo o le Sosaiete a Piula Tuai i le Mataupu taua i le lalolagi atoa e aofia ai ma le Pasefika i le faaititia ma tafieseina o le Sauaina o Tina ma Tamaita’i? (Stop the Violence Against Women)

Upu Faai’u

“O Le Fa’ae’etia - Atinaega Ma Le Unaia O Avanoa Mo Tina Ma Tamaitai Samoa”

E le a’oaia e Laupu’ā ia Tamafaigā; e le aiaina foi e le Matapia ia le Manaia. Ae o se lu’itau taua tele lea o lenei vaitau Tina e, ma Tamaita’i o Samoa. ‘Aua le nofo-a’i ona o faamanuiaga ua maua. Ae ao i Tina ma Tama’ita’i uma o Samoa ona mataala ma saga finau pea mo nisi fa’amanuiaga silisili e ala mai ai le alofa o le Atua mo Tina ma Tama’ita’i uma, o nai o outou taitoalua, fanau ma aiga. Ae le gata i lea o soo se auaunaga ma le tautuaina o le Atua ma lona finagalo e ala i soo se valaauina i le atinaega o si o tatou atunuu.

O le toe fautuaga a le Pepa nei mo le paia o Faletua o le Aufaigaluega. A e fia fa’ae’etia, ma e manatu ia fa’asolosolo atili faamanuiaga o le atina’ega ma le unaia o avanoa mo Tina ma Tamaita’i uma o Samoa, o le tu’ualalo: ia fa’amuumua lou alofa i le Atua, ona soso’o ai lea ma lou alofa i si ou to’alua ma lau fanau. Ia malu i lou alofa lou aiga, aua foi: “Charity begins at home.”³⁶ Afai ua lelei ma malu lou aiga, ona e alo loa lea e fai ‘i, a uma, liliu ane fai foi ma ‘o! Ae ‘aua ne’i pei o le fai-Fale-Aitu iloga o Aulavemai, fai mai e tā i ‘o ma ‘o ana faafiafiaga ae lē matamata Vaimoso. O le uiga o le tala, ia faamuamua le Atua, sosoo ai ma lou aiga, ae le o le alu o lou malosi i ‘o ma ‘o ma ‘o, ae mama i ōa toe mama i taloa lou aiga.

O le mau a le Perofeta o Mika 6:8 *“Se a foi se mea e finagalo ai leova ia te oe, pe a le o ia mea, ia fai le amiotonu, ia naunau i le alofa, ma ia feood’i ma lou Atua ma le loto faamaulalo.”* Ae o la le Aposetolo o Paulo: *“Aua o outou uma lava na papatisoina ia Keriso, ua outou oofu ia Keriso, e le o i ai se lutaia po o se Eleni, e le o i ai se pologa po o se sa’oloto, e le o i ai se tane po o se fafine; aua ua tasi lava outou uma ia Keriso Iesu.”*(Kalatia 3: 27-28).

Ina ne’i galo, o le mau tauave a le Au Uso Fealofani o le Ekalesia Metotisi i Samoa.

“Ia Fealofani ma Fealolofaa’i ma ia Iloa Keriso ma Faailoa Atu o Ia i Nisi”

³⁶CHARITY BEGINS AT HOME - Cambridge English Dictionary. <https://dictionary.cambridge.org/dictionary>